



迂齋先生樓公四明儒碩也其文祖韓柳其學導濂伊
其論議辯博步趨於老泉坡穎間平時游意藝苑採擷
會粹動有程式朝華夕秀部居條流如匠石觀於鄧林
凡宗棟杙楹方圓脩短默計而潛蓄之斧斤一入了無
遺材其用力於古史若東漢詔令網羅散軼輯成一書
特其及餘耳然足以彰炎圖之盛治備

昭代之華典久未鏤傳日者東粵 師卿程公以無垢
先生語孟解摹本寢泐易而新之且亟見遺因還書懸
以前說錄其副往公雅敬前脩思惠後學必能出帑餘
刊善本布之同文之世俾觀者知文章爾雅不獨專美
於西都云紹定癸巳中秋日門人通奉大夫叅知政事



兼同知樞密院事鄭清之謹識

學生汪衛社校正

光曩侍 迂齋樓先生誨席一日讀五代史先生笑謂
光曰歐公作之命徐無黨註之徐六一門人也嗚呼先
生之志遠矣先生生死文字間茂製滿家少須蒼最次
第流傳惟東漢詔令成書已久手所勘訂當在他書先
亟求鋟梓俾與西漢詔令駢行以續成一代典章嗚呼
先生又豈以此書為身後名哉紹定戊子中秋日堦范
光識

兩漢詔令總論

翰林學士洪咨夔撰

自典謨訓誥誓命之書不作兩漢之制最為近古一曰策書其文曰維某年月日二曰制書其文曰制誥詔三公三曰詔書其文曰告某官如故事四曰誡勅其文曰有詔勅某官此其凡也策有制策詔策親策勅有詔勅璽勅密勅書有策書璽書手書權書赫蹠書詔有制詔親詔密詔特詔優詔中詔清詔手筆下詔遣詔令有下令著令摯令及令甲令乙令丙諭有口諭風諭譙諭宥罪有赦訓諸王有誥召天下兵有羽檄要誥有誓約廷拜有贊以致有報有賜有問有誥又有手迹手記詔記

其曰恩澤詔書寬大詔書一切詔書及哀痛之詔隨事
名之此其目也策命簡長二尺短者半之以篆書罷免
用尺一末兩行以隸書遺單于書牘以尺一寸選舉召
拜亦書之尺一板古今篆隸文體曰鶴頭書與偃波書
俱詔板所用漢則謂之尺一簡詔書有真草又有案
案者寫詔之文一九十行細書以賜方國札牒也孟康
曰漢初有三璽蔡邕獨斷曰天子六璽皆白玉螭虎紐
輿地志曰漢封詔璽用武都紫泥故制詔皆璽封尚書
令印重封唯赦贖令司徒印露布州郡詔記綠緋方底
用御史中丞印通官文書不著姓司隸詣尚書封胡降
檄著姓非故事詔書皂囊施檢報書綠囊密詔或衣帶

間丹書藏之石室策書藏之金匱此其制也漢世代言
未設官王言作命厥意猶古而討論潤色亦間有其人
高后令大謁者張澤報單于嫚書淮南安王善文辭武
帝每為報書及賜常召司馬相如視草光武答北匈奴
藁草司徒掾班彪所上至永寧中陳忠謂尚書出納帝
命為王喉舌諸郎鮮有雅材每為詔文轉相求訪且辭
多鄙固遂薦周興為尚書郎秦少府吏四人在殿中至
發書謂之尚書漢曰之武昭以後稍重張安世以善書
給事尚書囊簪筆事武帝數十年後漢始置尚書郎三
十六人主作文書起草月賜赤管大筆諭縻墨此其造
命之原也詔御史大夫下相國相國下諸侯二御史中

執法下郡守制下御史御史大夫下丞相丞相下中二千石二千石下郡太守諸侯丞相後漢詔有以東觀漢記漢名臣奏等書見於注其改詔為制為誥或謂避武后諱世祖官王閔子詔附見董賢傳曄書逸之大氏史遷所筆皆有深意圖文賻而意不逮曄則文亦不逮乎固矣咨夔假守龍陽俗古事簡因得縱觀三史哀其所謂詔制書策令勅諭報誓約之成章者凡若干通事著其畧每帝以臆見繫之釐為若干卷摠曰兩漢詔令以補續書之亡欲觀漢治者當有考於斯文

右西漢詔令四百一章舊傳西漢文類所載尚多闕畧吳郡林德祖虔實始采括傳志參之本記斷章析簡掇之無遺方薈蕞在紙未遑詮錄間以示余余因取其具藁以世次先後自高祖至平帝人別為篇又差攷歲月纂而成書且叙其末曰古之盛王與道為一故其酬酢之間理言遺事皆足以為萬世法是以事為春秋言為尚書而書之所傳自唐虞夏商周上下千數百載間而存則今之五十八篇而已由秦漢以來置學官弟子誦說研究至有白首沒身莫能詣其極者大哉王言蓋聖人之防表也自五十八篇而後起衰周至五代之末又千數百載間其為詔令溫醇簡盡而猶時有三代之遺

法者唯西漢為然其進退美惡不以溢言沒其實其申
飭訓戒皆至誠明白節緩而思深至叢脞大壞之餘其
施置雖已不合古道當人心然猶陳義懇到雍容而不
迫此其一代之文流風未泯顧猶不可及又况文寔兼
盛哉昔者文中生以聖人之重自任迺始斷自七制之
主列為四範以續典謨訓誥誓命之文然其書世不傳
莫得而述故備載如彼德祖以學行名播神方將以文
詞為時用方今

昭回之章然綸之美固以轢絕中古陋漢唐而莫稱是
書也雖未能比唐虞夏商周之隆庶其或者亦足為王
言之弁藻尚書之鼓吹云大觀三年歲次己丑十月壬

申朔信安程俱叙

聖人者群言之所折衷也唐虞以來凡經聖人所刊刻
則後世尊之曰經炳如日星人皆仰之莫得而損益也
左氏大史公才雖名世號為廣記備言多愛寔錄而已
此皆自度去取不可望聖人故不敢以為已任也西漢
接三代末流訓詞深厚文章爾雅猶有渾渾灑灑靈靈
之餘風下視晉魏周齊陳隋號令文采卑陋甚矣三代
而上超軼絕塵不可方駕學者勉追古人庶乎接武漢
世不猶愈乎余讀班固書罔羅詔令之文一言必錄亦
莫敢去取焉吾友程子致道類次成裘遂為完書二百
年間興衰情偽不待區別白黑較然今

聖人在上衆言折衷之時也倘取而賜觀掇其若費秦
誓者列諸經以詔萬世則安知其湮晦涕洟不錄吾二
人以光明乎程子精敏工於為古文其才堪討論潤色
之職者也故於此書欣然比次不日成之越三日甲戌
吳郡林虔書

文之用於世尚矣繇三代而下溫厚壯麗號為近古宜
莫如西漢然而訓告命令之文雜出於紀表志傳之間
離散曼漉卒然求之而不可得是故學者病之吳郡林
德祖姑蒐哀會粹離而出之章收句采無所遺逆四百
一章信安程致道又從而差攷比輯類為完書起高祖
迄孝平以世統年以年統月以月統事其先後有倫其

始卒有序條貫備具上下洽通於是二百十四年之間
漢之所以理亂宗替興衰得失之原灼然可考如指諸
掌信乎有功於斯文也先人有言學者知讀西漢書其
為辭章必有可觀余以是言陰察天下之文士百不失
一二焉德祖致道皆有俊才究極群書溢于文辭既已
追古作者為徒矣又以其餘力繹味漢史細其詔令成
一家言非深知而為好之疇克爾惟漢去三代未遠其
號令文章未必皆不合古顧不更聖人靡所折衷耳昔
楊子雲以為經莫大於易故惟太玄傳莫大於論語作
法言今二君亦取西漢詔令纂次成書以續虞夏商周
五十八篇之後是亦子雲之志也若乃經史奧義與所

以述作之由則二君論之詳矣此不復云大觀三年十
二月十六日宜興蔣璿書

處與致道成此書久矣族弟釋慶然曰主上天縱
睿聖欽明文思所下

詔令典雅謹嚴千載以來莫能及也將備演綸尤
當竭才少望

清光學者之於文章必師唐虞三代然如西漢訓
辭宜在所采以為潤色之助願請是書鏤板以廣
其傳庶得此者便於考閱庶嘉其志而不得辭遂
以授之

兩漢詔令目錄

西漢

卷第一 高祖

諭諸縣鄉邑

為義帝發喪告諸侯

祠祭詔

赦天下

封閩粵王詔

令善遇高爵詔

詔擇齊荆王

尊太上皇詔

立楚王梁王詔

封長沙王詔

復諸侯子等詔

赦天下

封爵之誓

賜韓王信書

疑獄詔

獻費詔

立南粵王詔

置守冢詔

三月詔

卷第二 惠帝

恤吏給軍賦

卷第三 呂后

差次功臣

議昭靈等尊號詔

卷第四 文帝

釋代王詔

求賢詔

議立吳王詔

赦燕吏民詔

赦燕吏民詔

廢少帝詔

報單于書

報單于書

報單于書

報單于書

即位赦天下詔

有司請建太子詔二

養老詔

賜尉佗書

日食詔

除誹謗法詔

詔議法

不受獻詔

擊匈奴書

勸農書

置三老孝悌力田常負詔

封功臣詔

振貸詔

封宋昌詔

列侯之國詔

開藉田詔

詔議犯法者收坐

勸農議

遣列侯之國詔

遣匈奴書

遣匈奴書

親耕親桑具禮儀詔

除祕祝詔

除肉刑詔

勸農詔

增祀無祈詔

答鼂錯壘書

策賢良文學士

議郊祀詔

議可以佐百姓者詔

遺匈奴書

遺詔

卷第五 景帝

文帝廟樂舞

詔議徙民寬地

詔議受所監臨令

減笞詔

詔封蕭何後

赦吳吏民等詔

擊七國詔

頒繫老幼詔

讞獄詔

吏車服詔

減笞詔

讞獄詔

令二千石修職

訾筭詔

勸農桑采金玉詔

卷第六 武帝

復高年子孫詔

修山川祠詔

諭淮南王

詔策賢良

冊公孫弘

賜嚴助書

詔問公卿

賜陳后策

赦鴈門代郡軍士詔
詔議不舉孝廉者罪

赦天下

許諸侯王分子弟邑

益封衛青詔

封丞相弘詔

報公孫弘

赦天下詔

益封衛青

封公孫敖等詔御史

削梁王褒詔

詔太常禮官

賞霍去病等

置武功賞官詔

遣謁者巡行天下詔

議后土祀

渾邪王降益封去病

封蕭何後

益封去病等

封齊王閔策

封燕王策

封廣陵王策

遣博士大等循行天下詔

得寶鼎

遣博士中等循行詔

封樂大詔

封周子南君詔

封石慶詔

封真定泗水王

卜式賜爵詔

封呂嘉等詔

封韓千秋等

詔丁酉拜况子郊

敕責楊樸書

減內地史租詔

改元元封詔

封泰山

巡邊詔

遣使告單于

遷東越民詔

增太室祠詔

天旱

甘泉產芝詔

使公孫遂往朝鮮

赦汾陽等詔

赦所幸縣詔

赦汾陰詔

察茂才異等詔

詔免寬

報石慶

赦汾陰安邑詔

改元詔

欲遂困胡詔

封李廣利詔

詔李陵

詔路博德

賜吾丘壽王璽書

報胡建制

報齊人延年

黃金改名

封劉屈氂

封李壽等

責問御史大夫

賜丞相璽書

搜粟詔

詔畜馬補邊

赦天下詔

報車千秋

封莽通等

卷第七 昭帝

勿收振貸詔

詔民勿出馬

舉賢良文學

立鈞町王詔

賜遺韓福等詔

封杜延年等詔

賜燕王璽書

赦燕太子等詔

母歛馬口錢詔

詔母澹

封范明友等詔

封傅介子詔

封張安世詔

叔粟當賦詔

減口賦詔

卷第八 宣帝

賞功詔

議戾太子號謚等詔

益封張安世詔

益封霍光詔

置廷平詔

議武帝廟樂詔

賜陳遂璽書

損膳減樂人詔

地震詔

復室宗屬籍詔

嘉霍光詔

賞王成詔

封霍雲詔

賜鰥寡舉賢良詔

罷車騎等屯兵詔

舉孝弟等詔

吏有喪勿繇事詔

子首匿父母等勿坐詔

赦為霍氏所誣誤者詔

賜霍后策

減鹽價詔

課獄吏殿最詔

鳳皇甘露詔

以黃霸為潁川太守詔

博舉吏民詔

賜張敞璽書

赦天下詔

察吏詔

更名詔

封海昏侯詔

封郾吉等詔

報丙吉詔

諭蕭望之

禁彈射詔

遣太中大夫循行天下詔

報張安世詔

褒尹翁歸詔

神爵集宮苑等詔

親奉祀詔

改元神爵詔

止諸侯王等母朝詔

以黃霸為潁川太守詔

博舉吏民詔

賜張敞璽書

赦天下詔

察吏詔

更名詔

封海昏侯詔

封郾吉等詔

報丙吉詔

諭蕭望之

禁彈射詔

遣太中大夫循行天下詔

報張安世詔

褒尹翁歸詔

神爵集宮苑等詔

親奉祀詔

改元神爵詔

止諸侯王等母朝詔

褒朱邑詔

祠江海寺

賜趙充國書

美陽得罪詔

赦天下詔

益吏祿詔

策蕭望之

封鄭吉詔

神光詔

褒黃霸詔

詔勿行苛政

單于稱臣詔

日食詔

問黃霸

免丙顯

赦天下減民筭等詔

客禮待單于詔

賜汝南太守等詔

察計簿詔

詔毋舉吏六百石

卷第九 元帝

遣光祿大夫循行天下詔

詔關東今年毋出租賦詔寺

議律令詔

詔宮館希御幸者勿繕治

問賈捐之

罷擊朱厓詔

赦天下詔

求言詔

詔報于定國

詔報貢禹

免蕭望之等詔

賜蕭望之爵邑詔

賜諸葛豐書

免諸葛豐詔

赦天下詔

罷角抵宮館等詔

引見丞相御史入受詔條責以職事

赦天下詔

詔條責丞相御史

議罷郡國廟

議廟詔

赦天下詔

日食舉茂材賢良詔

赦天下詔

賜馮奉世爵書

罷吏士

賜馮奉世等爵詔

三年十一月詔

赦天下詔

求直言詔

徵周堪詔

詔初陵勿置縣邑

賜淮陽王欽璽書

議封甘延壽陳湯詔

遣諫大夫博士詔

赦天下詔

詔毋徵召證案不急之事

改元竟寧詔

張譚為御史大夫詔

使車騎將軍口諭單于

敕諭東平王宇璽書

賜東平太后璽書

敕東平王傳相詔書

卷第十 成帝

赦天下詔

報匡衡

報王鳳詔

報張禹策

赦奉郊縣減天下賦筭詔

賜許嘉策

遣諫大夫循行天下詔

復東平王削縣詔

詔舉賢良方正

詔嘉王尊

改元河平詔

大赦天下詔

減死刑詔

免王商詔

策直言

封楚王囂子詔

報許後

報王鳳

詔順四時月令

詔舉可充博士者

封王音詔

勸農詔

遣諫大夫理守詔

封丙吉後

封史丹詔

詔舉敦厚有行義能直言詔

賜王音等書

水旱詔

罷昌陵詔

賜史丹策

冊免薛宣

龍見日蝕詔二

封淳于長等詔

遣太中大夫嘉等循行天下詔

令皇太后詔有司

詔有司

禁車服奢僭詔

李星詔

報翟方進

遣王立就國

還平恩侯親屬詔

還馮參詔

立皇太子詔

封殷後詔

賜翟方進策

皇太后詔大司馬莽丞相大司空

又詔有司

卷第十一 哀帝

益封王根等詔

罷樂府詔

限名田詔

益河間戶詔

遣光祿大夫循行水災詔

詔王莽

遣王根等就國詔

詔舉孝弟等

策免何武

策免師丹

策彭宣

問李尋

免孫寶詔

尊帝太后詔

葬丁太后詔

改元易號詔

改元易號赦令詔

策免傅喜

報平當

詔王崇

令太皇太后詔有司

封董賢寺詔

封傅商詔

左遷毋將隆詔

舉明習兵法者

策免孔光

策蕭育

日蝕赦天下詔

責王嘉

策免丁明

冊董賢為大司馬

免傅嘉詔

免孫寵息夫躬詔

卷第十二 平帝

罷董賢詔

冊董賢

貶趙后詔二

傅后退就桂宮詔

詔勿陳赦前事

策彭宣

還傅嘉詔

益中山后湯沐邑詔

封師丹詔

詔以王莽為太傅

安漢公策

更名詔

賜龔勝酈漢策

公孫弘後賜爵詔

封王堅固詔

詔勿繫老弱

置宗師詔

封劉歆王悼寺

詔孔光

授四輔寺詔

太后不親省小事詔

太后詔百僚

詔王莽二

太后詔問公卿

詔莽食肉

嘉王莽詔

賜馬宮策

聽莽讓益封詔

問孔光以莽讓二子封拜詔

議九錫詔

九錫策

遺詔

東漢

卷第一 光武

策鄧禹為大司徒

封更始為淮陽王詔

勅鄧禹進兵

封卓茂詔

封功臣為列侯詔

封功臣策

詔報朱浮

省刑罰詔

徵鄧禹還

勅馮異征伐

列侯子孫復故國詔

得壘綏祠高廟詔

勞馮異壘書

詔寬六百石呂下吏罪

與隗囂手書

報耿弇

讓蓋延

報馮異詔

賜竇融璽書

進柔良退貪酷詔

詔報竇融

討龐萌與諸將書

勞耿弇

賜侯霸璽書

詔二千石撫循百姓

賜馮異錢帛詔

與公孫述書

賜隗囂詔

赦殊死以下

詔省縣減吏職

日食求賢良詔

田租三千稅一詔

賜馮異璽書

薄葬詔

罷輕車騎士材官樓船詔

詔上書不得言聖

舉賢良方正詔

王梁為濟南太守詔

報竇融詔

詔告隗囂

迎詔竇融

勅岑彭書

遣寇恂平潁川

報陳俊詔

勞郭伋

追爵陰貴人父詔

殺奴婢不減罪詔

報岑彭書

贈來歙詔

戒吳漢書

讓吳漢書

報吳漢書

諭公孫述詔

讓劉尚

邊吏不拘逗留法

詔太守不受異味

追封侯霸

戒馮勤

廢郭皇后詔

詔除邊郡盜穀死罪

立陽為皇太子詔

尊宣帝為中宗詔

地震詔

除杜高丹水長詔

報鄯善王

諭竇融勿為山陵

報威宮詔

却封禪詔

班彪上報

匈奴草詔

告祠高廟詔

遺詔

賜周黨帛詔

春日下寬大書

卷第二

明帝

即位詔天下

赦北銅鉗詔

詔有司順時氣

封陰興三子詔

賜東海傅相詔

詔百僚師尹順時令

封爵柏榮

報中山王焉

詔勸農桑謹刑罰

詔報鍾離意

日食求言詔

公卿遵時令平刑罰詔

復元氏縣田租詔

獲寶鼎詔

日食詔

班封事詔

報楚王英

勸農功詔

賜東平國傅于詔

申明科禁詔

汴渠成詔

日食勿劾三公制

賜楚國許太后詔

詔實固

朝堂奉觴上壽制禱雨詔

卷第三 章帝

趙憲太傅牟融太尉詔

詔報張酺

詔覈實受稟

詔順時令理冤獄

地震舉賢良詔

報東平王蒼書

貶阜陵王詔

糾嫁娶非法者詔

明德馬皇后辭封爵諸舅詔

明德馬皇后報皇帝

切責竇憲

詔論五經同異

賜東平王蒼琅琊王京書

封三舅太后報皇帝

日食舉直言詔

禱雨詔

詔糾獄吏迫脅無辜

求賢詔

沛濟南東平中山四王勿詔

廢太子慶詔

賜公卿助祭錢

東平王蒼辭歸國賜手詔

禁行幸勞擾詔

岐山獻銅器白鹿詔

東平憲王葬賜策

詔高才生受左氏穀梁春秋古文尚書毛詩

留馬光京師詔
賜流民公田詔

詔禁考掠
改西詔

詔除禁錮
詔賜鄭均毛義穀

罷嚴宣歷學詔
胎養令

詔用安靜之吏
改用四分歷詔

議增修群祀

賜三老孝弟力田帛

巡狩赦天下詔

鸞鳳見賜爵詔

禁十一月以後報囚

還北單于生口詔

興禮樂詔

詔齊相賜江草粟詔

詔報素安

稟給孤幼

以肥田賦貧民詔

勅御史司空

又興禮樂詔

詔報朱暉

赦出朱暉等

改章和元年詔

收下博侯晃及母太姬璽綬削利侯剛戶封詔

復昇陵王爵詔

卷第四 和帝

別下齋校本

皇太后詔

罷鹽鐵詔

策韋彪

匈奴平薦功祖廟詔

封竇憲寺詔

北狄西域降附賜錢帛詔

封班超詔

詔求曹相國後

覈實貧民戶口人數

選舉詔

勅張蕃

報梁王暢詔

舉賢良詔

選郎官任典城者

災異求助詔

手詔勿議降黜太后

追封梁竦制

疏導溝渠詔

褒劉愷詔

禁踰侈詔

詔擇良吏

令民半入田租

緣邊歲舉孝廉詔

班刻漏四十八箭詔

稟給流民詔

詔報張禹

免王侯就國詔

察苛吏詔

太后策周馥貴人

太官不受獻詔

卷第五

殤帝

皇太后詔

減服御詔

出掖庭宮人詔

勅司隸校尉部刺史覈實水灾

卷第六 安帝

立皇帝策

皇太后詔

檢勅外戚賓客詔

舉明習陰陽灾異者

令王主官屬通得外補

以王安為郎中詔

詔公卿勿以灾異自貶

詔舉有道術達於政化之士

詔封二十八將

旱蝗詔安輯黎元

禁非時供薦新味

霖雨傷稼詔

恤貧弱詔

賑樂成王長詔

申制度科品

詔河南尹豹等

詔高句麗驪

舉刺史二千石令長詔

廢太子保詔群臣

卷第七 順帝

封孫程等詔

追策宋漢

增東海王臻食邑詔

又赦天下詔

令冀部勿收今年田租

封還大珠詔

祠楊震策

大赦天下詔

祠楊震策

大赦天下詔

祠楊震策

大赦天下詔

祠楊震策

大赦天下詔

祠楊震策

大赦天下詔

祠楊震策

大赦天下詔

祠楊震策

禱雨詔

舉孝廉限年詔

簡核刺史二千石詔

地震求直言詔

徵楊倫詣廷尉

赦天下詔

策周舉

日食詔上封事

詔問災異

褒張綱詔

案行地震諸郡

卷第八 質帝

閔雨寬恤詔

定三陵序次詔

寬案驗徵罪詔

貶濟廣陵九江郡詔

詔子弟就學月一饗會

卷第九 桓帝

嚴選舉詔

減作陵者刑答月數

太后增封濟北王次詔

日食寬恤詔

葬朽骨詔

追褒周舉詔

太后歸政詔

改元和平詔

申明輿服制度

禁郡國賣酒詔

封單超寺詔

遣居車兒還單于詔

策馮緄

詔旱災郡勿收租

陳蕃太傅詔

封陳蕃詔

卷第十 靈帝

詔問蔡邕灾異

追策楊賜

卷第十一 獻帝

原輕繫詔

儒生依科罷者聽為太子舍人

報有司請建長秋詔

廢伏皇后策

兩漢詔令目錄終

西漢詔令卷第一

凡直叙事實不載辭命者不錄如紀載建元元年秋七月詔曰衛士轉置送迎二萬人其省萬人如此類不錄

高祖 四 十

諭諸縣鄉邑 元年十一月

父老苦秦苛法久矣誹謗者族耦語者弃市吾與諸侯約先入關者王之吾當王關中與父老約法三章耳殺人者死傷人及盜抵罪餘悉除去秦法吏民皆按堵如故凡吾所以來為父兄除害非有所侵暴母恐且吾所以軍霸上待諸侯至而定要東耳

為義帝發喪告諸侯 二年三月

天下共立義帝北面事之今項羽放殺義帝江南大逆

無道寡人親為發喪兵皆縞素悉發關中兵收三河士南浮江漢以下願從諸侯王擊楚之殺義帝者

祠祭詔

二年見郊祀志

吾甚重祠而敬祭今上帝之祭及山川諸神當祠者各以其禮祠如故

立楚王梁王詔

五年正月

楚地已定義帝亡後欲存卹楚眾以定其主齊王信習楚風俗更立為楚王王淮北都下邳魏相國建成侯彭越勤勞魏民卑下士卒常以少擊眾數破楚軍具以魏故地王之號曰梁王都定陶

赦天下

五年正月

兵本得休八年萬民與苦甚與音相與之與今天下事畢其赦天下殊死已下

封長沙王詔

五年二月

故衡山王吳芮與子二人兄子一人從百粵之兵以佐諸侯誅暴秦有大功諸侯立以為王項羽侵奪之地謂之番君番蒲反其以長沙豫章象郡桂林南海立番君芮為長沙王

封閩粵王詔

五年二月

故粵王亡諸世奉粵祀秦侵奪其地使其社稷不得血食諸侯伐秦亡諸身帥閩中兵以佐滅秦項羽廢而弗立今以為閩粵王王閩中地勿使失職

復諸侯子等詔五月

諸侯子在關中者復之十二歲其歸者半之民前或相聚保山澤不書名數今天下定令各歸其縣復故爵田宅吏以文法教訓辨告勿笞辱民以飢餓自賣為人奴婢者皆免為庶人軍吏卒會赦其亡罪而亡爵及不滿大夫者皆賜爵為大夫故大夫以上賜爵各一級其七大夫以上皆令食邑非七大夫已下皆復其身及戶勿事

令善遇高爵詔前

七大夫公乘以上皆高爵也諸侯子及從軍歸者甚多高爵吾數詔吏先與田宅及所當求於吏者亟與爵或

人君上所尊禮久立吏前曾不為決甚亡謂也異日秦民爵公大夫以上令丞與充禮今吾於爵非輕也吏獨安取此且以法有功勞行田宅今小吏未嘗從軍者多滿而有功者顧不得背公立私守尉長吏教訓甚不善其令諸吏善遇高爵稱吾意且靡問有不如吾詔者以重論之

赦天下六年十一月

天下既安豪桀有功者封侯新立未能盡圖其功身居軍九年或未習法令或以其故犯法大者死刑吾甚憐之其赦天下

詔擇齊荆王六年十一月

齊古之建國也今為郡縣其復以為諸侯將軍劉賈數有大功及擇寬惠脩潔者王齊荆地

封爵之誓

見高惠高后文功臣表六年二月甲申始剖符印功臣

使黃河如帶泰山若屬國以永存爰及苗裔

又

非劉氏不王若有亡功非上所置而侯者天下共誅之

尊太上皇詔

六年五月

人之至親莫親於父子故父有天下傳歸於子子有天下尊歸於父此人道之極也前日天下大亂兵革並起萬民苦殃朕親被堅執銳自帥士卒犯危難平暴亂立諸侯偃兵息民天下大安此皆太公之教訓也諸王通

侯將軍群卿大夫已尊朕為皇帝而太公未有號今上尊太公曰太上皇

賜韓王信書

六年秋

專死不勇專生不任寇攻馬邑君王力不足以堅守乎安危存亡之地此二者朕所以責於君王

疑獄詔

七年

制詔御史獄之疑者吏或不敢決有罪者久而不論無罪者久繫不決自今以來縣道官獄疑者各讞所屬二千石官二千石官以其罪名當報所不能決者皆移廷尉廷尉亦當報之廷尉所不能決謹具為奏傳所當比律令以聞

擇代王詔

十一年正月

代地居常山之北與夷狄邊趙乃從山南有之遠教有胡寇難以為國頗取山南太原之地益屬代代之雲中以西為雲中郡則代受邊寇益少矣王相國通侯吏二千石擇可立為代王者

獻費詔

十一年二月

欲省賦甚今獻未有程吏或多賦以為獻而諸侯王尤多民疾之令諸侯王通侯常以十月朝獻及郡各以口數率人歲六十三錢以給獻

求賢詔

前

蓋聞王者莫高於周文伯者莫高於齊桓皆待賢人而

成名今天下賢者智能豈特古之人乎患在人主不交故也士奚由進今吾以天之靈賢士大夫定有天下以為一家欲其長久世世奉宗廟亡絕也賢人已與我共平之矣而不與我共安利之可乎賢士大夫有肯從我游者吾能尊顯之布告天下使明知朕意御史大夫昌下相國相國鄼侯下諸侯王御史中執法下郡守其有意稱明德者必身勸為之駕遣詣相國府署行義年有而弗言覺免年老癯病勿遣

立南粵王詔

五月

粵人之俗好相攻擊前時秦徙中縣之民南方三郡使與百粵雜處會天下誅秦南海尉它居南方長治之甚

有文理中縣人以故不耗減粵人相攻擊之俗益止俱賴其力今立宅為南粵王

議立吳王詔十二年十月

吳古之建國也日者荆王兼有其地今死亡後朕欲復立吳王其議可者

置守家詔十一月

秦皇帝楚隱王魏安釐王齊愍王趙悼襄王皆絕亡後其與秦始皇帝守家二十家楚魏齊各十家趙及魏公子亡忌各五家令視其家復亡與他事

赦燕吏民詔

燕王綰與吾有故愛之如子聞與陳豨有謀吾以為亡

有故使人迎綰綰稱疾不來謀反明矣燕吏民非有罪也賜其吏六百石以上爵各一級與綰居去來歸者赦之加爵亦一級

三月詔

吾立為天子帝有天下十二年于今矣與天下之豪士賢大夫共定天下同安輯之其有功者上致之王次為列侯下為食邑而重臣之親或為列侯皆令自致吏得賦歛女子公主為列侯食邑者皆佩之印賜大第室吏二千石徙之長安受小第室入蜀漢定三秦者皆世世復吾於天下賢士功臣可謂亡負矣其有不義背天子擅起兵者與天下共誅伐之布告天下使明知朕意

西漢詔令卷第一

西漢詔令卷第二

惠帝

恤吏給軍賦

吏所以治民也能盡其治則民賴之故重其祿所以為也今吏六百石以上父母妻子與同居及故吏嘗佩將軍都尉印將兵及佩二千石官印者家唯給軍賦他無所有

西漢詔令卷第二

西漢詔令卷第三

呂后

差次功臣

二年春

高皇帝匡飭天下諸有功者皆受分地為列侯萬民大安莫不受休德朕思念至於久遠而功名不著亡以尊大誼施後世今欲差次列侯功以定朝位臧于高廟世世勿絕嗣子各襲其功位其與列侯議定奏之

廢少帝詔

四年夏

凡有天下治萬民者蓋之如天容之如地上有驩心以使百姓百姓欣然以事其上驩欣交通而天下治今皇帝疾久不已廼失惑昏亂不能繼嗣奉宗廟守祭祀不

可屬天下其議代之

議昭靈等尊號詔七年五月

昭靈夫人太上皇妃也武哀侯宣夫人高皇帝兄弟也
號謚不稱其議尊號

報單于書見匈奴傳

單于不忘弊邑賜之以書弊邑恐懼退日自圖年老氣
衰髮齒墮落行步失度單于過聽不足以自汙弊邑無
罪宜在見赦竊有御車二乘馬二駟以奉常駕

西漢詔令卷第三

西漢詔令卷第四

文帝三十四

即位赦天下詔

制詔丞相太尉御史大夫間者諸呂用事擅權謀為大
逆欲危劉氏宗廟賴將相列侯宗室大臣誅之皆伏其
事朕初即位其赦天下賜民爵一級女子百戶牛酒酺
五日

封功臣詔元年十月

前呂產自置為相國呂祿為上將軍擅遣將軍灌嬰將
兵擊齊欲代劉氏嬰留滎陽與諸侯合謀以誅呂氏呂
產欲為不善丞相平與太尉勃等謀奪產等軍朱虛侯

章首先捕斬產太尉勃身率襄平侯通持節承詔入北
軍典客揭奪呂祿印其益封太尉勃邑萬戶賜金五十
斤

云云

有司請建太子詔

正月

朕既不德上帝神明未歆饗也天下人民未有慝志今
縱不能博求天下賢聖有德之人而壇天下焉而曰豫
建太子是重吾不德也謂天下何其安之

又

楚王季父也春秋高閱天下之義理多矣明於國家之
體吳王於朕兄也淮南王弟也皆秉德以陪朕豈為不
豫哉諸侯王宗室昆弟有功臣多賢及有德義者若舉

有德以陪朕之不能終是社稷之靈天下之福也今不
選舉焉而曰必子人其以朕為忘賢有德者而專於子
非以憂天下也朕甚不取

振貸詔

三月

方春和時草木群生之物皆有以自樂而吾百姓鰥寡
孤獨窮困之人或沾於死亡而莫之有憂為民父母將
何如其議所以振貸之

養老詔

老者非帛不煖非肉不飽今歲首不時使人存問長老
又無布帛酒肉之賜將何以佐天下子孫孝養其親今
聞吏稟當受鬻者或以陳粟宣稱養老之意哉具為令

封宋昌詔

六月

方大臣誅諸呂迎朕朕疑皆止朕唯中尉宋昌勸朕朕已得保宗廟已尊昌為衛將軍其封昌為壯武侯諸從朕六人皆至九卿

賜尉佗書

元年

皇帝謹問南粵王甚苦心勞意朕高皇帝側室之子弃外奉北藩于代道里遼遠壅蔽撲愚未嘗致書高皇帝弃群臣孝惠皇帝即世高后自臨事不幸有疾日進不衰以故諄暴乎治諸呂為變故亂法不能獨制廼取它姓子為孝惠皇帝嗣賴宗廟之靈功臣之力誅之已畢朕以王侯吏不釋之故不得不立今即位乃者聞王遺

將軍隆慮侯書求親昆弟請罷長沙兩將軍朕以王書罷將軍博陽侯親昆弟在真定者已遣人存問脩治先人家前日聞王發兵於邊為寇災不止當其時長沙苦之南郡尤甚雖王之國庸獨利乎必多殺士卒傷良將吏寡人之妻孤人之子獨人父母得一亡十朕不忍為也朕欲定地犬牙相入者以問吏吏曰高皇帝所以介長沙王也朕不得擅變焉吏曰得王之地不足以為大得王之財不足以為富服領以南王自治之雖然王之號為帝兩帝並立亡一乘之使以通其道是爭也爭而不讓仁者不為也願與王分弃前患終今以來通使如故故使賈馳諭告王朕意王亦受之母為寇災矣上楮

五十衣中楮三十衣下楮二十衣遺王願王聽樂娛憂
存問鄰國

列侯之國詔

二年十月

朕聞古者諸侯建國千餘各守其地以時入貢民不勞
苦上下驩欣靡有違德今列侯多居長安邑遠吏卒給
輸費若而列侯亦無繇教訓其民其令列侯之國為吏
及詔所止者遣太子

日食求言詔

朕聞之天生民為之置君以養治之人主不德布政不
均則天示之災以戒不治乃十一月晦日有食之遣見
于天災孰大焉朕獲保宗廟以微眇之身託士民君上

之上天下治亂在予一人唯二三執政猶吾股肱也朕
下不能治育群生上以累三光之明其不德大矣今至
其悉心思朕之過失及知見之所不及旬以啓告朕及
舉賢良方正能直言極諫者以匡朕之不逮因各敕以
職任務省繇費以便民朕既不能遠德故憫然念外人
之有非憫下板是以設備未息今縱不能遠屯戍又飭兵
厚衛其罷衛將軍軍太僕見焉遺則足遺留也今當減
留終足充事而
已餘皆以給傳置

開藉田詔

正月

夫農天下之本也其開藉田朕親率耕以給宗廟粢盛
民謫作縣官及貸種食未入未備者皆赦之

除誹謗法詔五月

古之治天下朝有進善之旌誹謗之木所以通治道而
來諫者也今法有誹謗詆言之罪是使衆臣不敢盡情
而上無由聞過失也將何以來遠方之賢良其除之民
或祝詛上以相約而後相謾更以為大逆其有他言更
又以為誹謗此細民之愚無知抵死朕甚不取自今以
來有犯此者勿聽治

詔議犯法者收坐二年見刑法志

詔丞相太尉御史法者治之正所以禁暴而銜善人今
犯法者已論而使無罪之父母妻子同產坐之及收朕
甚弗取其議

詔議法見刑法志義詔相連

朕聞之法正則民慤罪當則民從且夫牧民而道之以
善者吏也既不能道又以不正之法罪之是法反害於
民為暴者也朕未見其便宜孰計之

勸農詔九月

農天下之大本也民所恃以生也而民或不務本而事
末故生不遂朕憂其然故今茲親率群臣農以勸之其
賜天下民今年田租之半

不受獻詔

鸞旗在前屬車在後吉行日五十里師行三十里朕乘
千里之馬獨先安之朕不受獻也其令四方毋求來獻

遣列侯之國詔三年十月

前日遣列侯之國辭未行丞相朕之所重其為朕率列侯之國

擊匈奴詔三年五月見匈奴傳

漢與匈奴約為昆弟無侵害邊境所以諭遣匈奴甚厚今右賢王離其國將眾居河南地非常故往來入塞捕殺吏卒毆侵上郡保塞蠻夷令不得居其故陵轉邊吏入盜甚驚無道非約也其發邊吏車騎八萬諸高奴遣丞相灌嬰將擊右賢王

遺匈奴書六年

皇帝敬問匈奴大單于無恙使係虜淺遺朕書云願寢

兵休士除前事復故約以安邊民世世平樂朕甚嘉之此古聖王之志也漢與匈奴約為兄弟所以遺單于甚厚背約離兄弟之親者常在匈奴然右賢王事已在赦前勿深誅單于若稱書意明告諸吏使無負約有信敬如單于書使者言單于自將并國有功甚苦兵事服繡袷綺衣長襦錦袍各一比踈一黃金飭具帶一黃金犀毗一繡十匹錦二十匹赤緋綠繒各四十匹使中大夫意謁者令肩遺單于

勸農詔十三年正月

道民之路在於務本朕親率天下農十年于今而野不加辟歲一不登民有飢色是從事焉尚寡而吏未加務

吾詔書教下歲勸民種樹而功未興是吏奉吾詔不勤而勸民不明也且吾農民甚苦而吏莫之省將何以勸焉其賜農民今年租稅之半

置三老孝悌力田常員詔

孝悌天下之大順也力田為生之本也三老眾民之師也廉吏民之表也朕甚嘉此二三大夫之行今萬家之縣云無應令豈寔人情是吏舉賢之道未備也其遺謁者勞賜三老孝者帛人五匹悌者力田二匹廉吏二百石以上率百石者三匹及問民所不便安而以戶口率置三老孝悌力田常員各率其意以道民焉

親耕親桑具禮儀詔

十三年二月

朕親率天下農耕以供粢盛皇后親桑以奉祭祀服其具禮儀

除祕祝詔

夏見郊祀志

祕祝之官移過於下朕甚弗取其除之

除肉刑詔

五刑見刑法志

制詔御史蓋聞有虞氏之時畫衣冠異章服以為戮而民弗犯何治之至也今法有肉刑三孟康曰黥劓二刑左右趾合一凡三也而姦不止其咎安在非乃朕德之薄教不明歟吾甚自愧故夫訓道不純而愚民陷焉詩曰愷弟君子民之父母今人有過教未施而刑已加焉或欲改行為善而道亡繇至朕甚憐之夫刑至斷支體刻肌膚終身不息

何其刑之痛而不德也豈為民父母之意哉其除肉刑有以易之及令罪人各以輕重不亡逃有年而免其為令

勸農詔六月

農天下之本務莫大焉今瘞身從事瘞古勤字而有租稅之賦是謂本末者無以異也其於勸農之道未備其除田之租稅賜天下孤寡布帛絮各有數

增祀無祈詔十四年春

朕獲執犧牲珪幣以事上帝宗廟十四年于今歷日彌長以不敏不明而久撫臨天下朕甚自愧其廣增諸祀壇場珪幣昔先王遠施不求其報望祀不祈其福右賢

左戚先民後已至明之極今吾聞祠官祝釐音倍皆歸福於朕躬不為百姓朕甚媿之夫以朕之不德而專鄉獨美其福百姓不與焉是重吾不德也其令祠官致敬無有所祈

荅鼂錯壘書

皇帝問太子家令上書言兵體三章聞之書言狂夫之言而明主擇焉今則不然言者不狂而擇者不明國之大患故在於此使夫不明擇於不狂是以萬聽而萬不當也

策賢良文學士

見鼂錯傳當在十五年九月

皇帝曰昔者大禹勤求賢士施及方外四極之內舟車

所至人迹所及靡不聞命以輔其不逮近者獻其明遠者通厥聰比善戮力以翼天子是以大禹能亡失德夏以長楸高皇帝親除大害去亂從並建豪英以為官師為諫爭輔天下之闕而翼戴漢宗也賴天之靈宗廟之福方內以安澤及四夷今朕獲執天下之正以承宗廟之祀朕既不德又不敏明弗能燭而智不能治此大夫之所著聞也故詔有司諸侯王三公九卿及主郡吏各帥其志以選賢良明於國家之大體通於人事之終始及能直言極諫者各有人數將以匡朕之不逮二三大夫之行當此三道朕甚嘉之故登大夫于朝親諭朕志大夫其上三道之要及永惟朕之不德吏之不平政之

不宣民之不寧四者之闕悉陳其志毋有所隱上以薦先帝之宗廟下以與萬民之休利著之于篇朕親覽焉觀大夫所以佐朕至與不至書之周之密之重之閉之與自朕躬大夫其正論毋枉執事烏虜戒之二三大夫其帥志毋怠

議郊祀詔

十五年春見郊祀志

有異物之神見于成紀母害於民歲以有年朕幾郊祀上帝諸神禮官議毋諱以朕勞

議可以佐百姓者詔

後元年三月

間者數年比不登又有水旱疾疫之災朕甚憂之愚而不明未達其咎意者朕之政有所失而行有過與乃天

道有不順地利或不得人事多失和鬼神廢不享與何
以致此將百官之奉養或廢無用之事或多與何其民
食之寡乏也夫度田非益寡而計民未加益以口量地
其於古猶有餘而食之甚不足者其咎安在無乃百姓
從事於末以害農者蕃為酒醪以靡穀者多六畜之食
焉者衆與細大之義吾未能得其中其與丞相列侯吏
二千石博士議之有可以佐百姓者率意遠思無有所
隱

遺匈奴書

後二年

皇帝敬問匈奴大單于無恙使當戶且渠彫渠難郎中
韓遼遺朕馬二匹已至敬受先帝制長城以北引弓之

國受令單于長城以內冠帶之室朕亦制之使萬民耕
織射獵衣食父子毋離臣主相安俱無暴虐今聞深惡
民貧降其趨背義絕約忘萬民之命離兩主之歡然其
事已在前矣書云二國已和親兩主驩說寢兵休卒養
馬世世昌樂翕然更始朕甚嘉之聖者日新改作更始
使老者得息幼者得長各保其首領而終其天年朕與
單于俱由此道順天恤民世世相傳施之無窮天下莫
不成嘉使漢與匈奴鄰敵之國匈奴處北地寒殺氣早
降故詔吏遺單于絺絮金帛綿絮它物歲有數今天下
大安為民熙熙獨朕與單于為之父母朕追念前事薄
物細故謀臣討失皆不足以離昆弟之驩朕聞天不頗

覆地不偏載朕與單于皆捐細故俱蹈大道也墮壞前
惡以圖長久使兩國之民若一家元元萬民下及魚鼈
上及飛鳥跂行喙息蠕動之類莫不就安利避危殆故
來者不止天之道也俱去前事朕釋逃虜民單于毋言
章尼寺朕聞古之帝王約分明而不食言單于留志天
下大安和親之後漢過不先單于其察之

和親詔後二年六月

朕既不明不能遠德使方外之國或不寧息夫四荒之
外不安其生封圻之內勤勞不處二者之咎皆自於朕
之德薄而不能達遠也間者累年匈奴並暴邊境多殺
吏民邊臣兵吏又不能諭其內志以重吾不德夫久結

難連兵中外之國將何以自寧今朕夙興夜寐勤勞天
下憂苦萬民為之惻但不安未嘗一日忘於心故遣使
者冠蓋相望結徹於道使車往還故徹如結也以諭朕志於單于
今單于反古之道計社稷之安便萬民之利新與朕俱
棄細故偕之大道結兄弟之義以全天下元元之民和
親以定始于今年

和親詔後二年

制詔御史匈奴大單于遺朕書和親已定亡人不足以
益衆廣地匈奴無入塞漢無出塞犯令約者殺之可以
久親後無咎俱便朕已許其布告天下使明知之

遺詔

朕聞之蓋天下萬物之萌生靡不有死死者天地之理物之自然奚可甚哀當今之世威嘉生而惡死厚葬以破業重服以傷生吾甚不取且朕既不德無以佐百姓今崩又使重服久臨以罹寒暑之數哀人父子傷長老之志損其飲食絕鬼神之祭祀以重吾不德謂天下何朕獲保宗廟以眇眇之身託于天下君王之上二十有餘年矣賴天之靈社稷之福方內安寧靡有兵革朕既不敏常畏過行以羞先帝之遺德惟年之久長懼于不終今乃幸以天年得復供養于高廟朕之不明與嘉之其奚哀念之有其令天下吏民令到出臨三日比釋服無禁取婦嫁女

云云

定不在令中者皆以此令比類從事

布告天下使明知朕意霸陵山川因其故無有所改歸夫人以下至少使

西漢詔令卷第四

西漢詔令卷第五

景帝五

文帝廟樂舞元年十月

蓋聞古者祖有功而宗有德制禮樂各有由歌者所以
發德也舞者所以明功也高廟耐直救反奏武德文始五
行之舞孝惠廟耐奏文始五行之舞孝文皇帝臨天下
通閔梁不異遠方除誹謗去肉刑賞賜長老收恤孤獨
以遂群生減耆欲不受獻罪人不帑讀與不誅亡罪不
私其利也除宮刑出美人重絕人之世也朕既不敏弗
能勝識此皆上世之所不及而孝文皇帝親行之德厚
侔天地利澤施四海靡不獲福明象乎日月而廟樂不

稱朕甚懼焉其為孝文皇帝廟為昭德之舞以明休德
然后祖宗之功德施乎萬世永永無窮朕甚嘉之其與
丞相列侯中二千石禮官具禮儀奏

詔議徙民寬地

元年正月

間者歲比不登民多乏食天絕天年朕甚痛之郡國或
饒匱無所農桑較畜較謂食養之畜謂也較古繫字或地饒廣薦艸
莽水泉而不得徙其議民欲徙寬大地者聽之

詔議受所監臨令

吏受所監臨以飲食免重受財物賤買貴賣論輕廷尉
與丞相更議著令

減笞詔

元年見刑法志

加笞重罪無異幸而不死不可為人其定律笞五百曰
三百笞三百曰二百

詔封蕭何後

二年見蕭何傳

制詔御史故相國蕭何高皇帝大功臣所與為天下也
今其祀絕朕甚憐之其以武陽縣戶二千封何孫嘉為
列侯

按景帝紀二年六月蕭何孫係

為列侯而本傳無孫名係者

赦吳吏民

詔

三年六月

廼者吳王濞等為逆起兵相脅誑誤吏民吏民不得已
今濞等已滅吏民當生濞等及逋逃亡軍者皆赦之楚
元王子執等與濞等為逆朕不忍加法除其籍毋令汙
宗室立平陸侯劉禮為楚王續元王後

制詔將軍蓋聞為善者天報以福為非者天報以殃高皇帝親垂功德建立諸侯幽王悼惠王絕無後孝文皇帝哀憐加惠王幽王子遂悼惠王子卬等令奉其先王宗廟為漢藩國德配天地明並日月而吳王濞背德反義誘受天下亡命罪人亂天下幣稱疾不朝二十餘年有司教請濞罪孝文皇帝寬之欲其改行為善今乃與楚王戊趙王遂膠西王卬濟南王辟光菑川王賢膠東王雄渠約從謀反為逆無道起兵以危宗廟賊殺大臣及漢使者迫劫萬民伐殺無罪燒殘民家掘其丘壟甚暴虐而卬等又重逆無軍其勸士大夫學反虜擊反虜

者深入多殺為道燒宗廟鹵御物朕甚痛之朕素服避正殿將功斬首捕虜比三百石以上皆殺無有所置敢有議詔及不如詔者皆要斬

頌繫老幼等詔三年見刑法志

高年老長人所尊敬也鰥寡不屬逮者人所哀憐也其著令八十以上八歲以下及孕者未乳師朱儒當鞠繫者頌繫之師古曰頌讀曰容寬容之不桎梏

獄獄詔中五年九月

法令度量所以禁暴止邪也獄人之大命死者不可復生吏或不奉法令以貨賂為市朋黨比周以苛為察以刻為明令亡罪者失職朕甚憐之師古曰職常也失其常罪也有罪

者不伏罪姦法為暴甚亡謂也諸獄疑若雖文致於法而於人心不厭者輒讞之

吏車服詔中六年五月

夫吏者民之師也車駕衣服宜稱六百石以上皆長吏也亡度者或不吏服出入閭里與民亡異令長吏二千石車朱兩轡師古據許慎李登說轡車之蔽也千石至六百石朱左轡車騎從者不稱其官衣服下吏出入閭巷亡吏體者二千石上其官屬三輔舉不如法令者皆上丞相御史請之

減笞詔見中六年同前

加笞者或至死而笞未畢朕甚憐之其減笞三百曰二

百笞二百曰一百又笞者所以教之也其定筆令

讞獄詔後元年正月

獄重事也人有智愚官有上下獄疑者讞有司有司所不能決移廷尉有令讞而後不當讞者不為失欲令治獄者務先寬

令二千石脩職後二年四月

雕文刻鏤傷農事者也錦繡纂組害女紅者也農事傷則飢之本也女紅害則寒之原也夫飢寒並至而能亡為非者寡矣朕親耕后親桑以奉宗廟粢盛祭服為天下先不受猷減太官省繇賦欲天下務農蚕素有畜積以備災害強母攘弱衆母慕寡老者以壽終幼孤得遂

長令歲或不登民食頗寡其咎安在或詐偽為吏吏以貨賂為市漁奪百姓侵牟萬民縣丞長吏也奸法與盜盜甚無謂也其令二千石各修其職不事官職耗亂者丞相以聞請其罪布告天下使明知朕意

訾算詔

五月

人不患其不知患其為詐也不患其不勇患其為暴也不患其不富患其無馱也其唯廉士寡欲易足今訾算十以上廼得官應劭曰古者疾吏之貪衣食足知崇廉士算不必衆布市籍不得官無訾又不得官朕甚怒之訾算四得官亡令廉士久失職貪夫長利

勸農桑禁采金玉詔

後三年正月

農天下之本也黃金珠玉飢不可食寒不可衣以為幣用不識其終始間歲或不登意為末者衆農民寡也其令郡國務勸農桑益種樹可得衣食物吏發民若取庸采黃金珠王者坐減為盜二千石聽者與同罪

西漢詔令卷第五

西漢詔令卷第六

武帝八十

復高年子孫詔

建元四年四月

古之立教鄉里以齒朝廷以爵扶世導民莫善於德然
即於鄉里先者奉奉高年古之道也今天下孝子順孫
願自竭盡臣承其親外迫公事內乏資財是臣孝心闕
焉朕甚哀之民年九十臣上已有受鬻法給米粟以為
糜鬻之六反
為復子若孫令得身帥妻妾遂其供養之事

修山川祠詔

建元五年

河海潤千里其令祠官修山川之祠為歲事曲加禮

諭淮南王

建元三年

皇帝問淮南王使中大夫王上書言事聞之朕奉先帝之休德夙興夜寐明不能燭重以不德是以比年凶菑害衆夫以眇眇之身託于王侯之上內有飢寒之民南夷相攘便邊騷然不安朕甚懼焉今王深惟重慮明太平以弼朕失稱三代至盛際天接地人迹所及咸盡賓服藐然甚慙嘉王之意靡有所終使中大夫助諭朕意王越事

詔策賢良

元光元年五月

朕聞昔在唐虞畫象而民不犯日月所燭莫不率俾周之成康刑錯不用德及鳥獸教通四海海外肅春北發渠搜氏羗徠服星辰不孛日月不蝕山陵不崩川谷不

塞麟鳳在郊藪河洛出圖書嗚呼何施而臻此與今朕獲奉宗廟夙興以求夜寐思若涉淵水未知所濟猗與偉與何行而可呂章先帝之洪業休德上參堯舜下配三王朕之不敏不能遠德此予大夫之所睹聞也賢良明於古今王事之體受策察問咸以書對著之于篇朕親覽焉

又詞

朕獲承至尊休德傳之亡窮施之罔極任大而守重是以夙夜不皇康寧永惟萬事之統猶懼有闕故廣延四方之豪雋郡國諸侯公選賢良修潔博習之士欲聞大道之要至論之極今予大夫衰然為舉首朕甚嘉之子

大夫其精心致思朕垂聽而問焉蓋聞五帝三王之道
改制作樂而天下洽和百王同之當虞氏之樂莫盛於
韶於周莫盛於勺聖主已沒鐘鼓堯絃之聲未衰而大
道微缺陵夷至乎桀紂之行王道大壞矣夫五百年之
間守文之君當塗之士欲則先王之法以戴翼其世者
甚衆然猶不能反日以仆滅至後王而後止豈其操持
或諄諄而失其統與固天降命不可復反必推之於大
衰而後息與烏虜凡所為屑屑夙興夜寐務法上古者
又何補與三代受命其將安在災異之變何緣而起性
命之情或夭或壽或仁或鄙習聞其號未燭厥理伊欲
風流而令行利清而姦改百姓和樂政事宣昭何修何
飾而膏露降百穀登德潤四海澤臻中木三光全寒暑
平受天之祐享鬼神之神靈德澤洋溢施於方外延及群
生子大夫明先聖之業習俗化之變終始之序講聞高
誼之日久矣其明以諭朕科別其條勿 勿并取之於
術慎其所出廼其不正不直不忠不極枉于執事書之
不 興自朕躬母悼後害子大夫其盡心靡有所隱朕
將親覽焉

又前

蓋聞虞舜之時游於巖廊之上垂拱無為天而下太平
周文王至於日昃不暇食而宇內亦治夫帝王之道豈
不同條共貫歟何逸勞之殊也蓋儉者不造玄黃旗旗

之飾及至周室設兩觀乘大路朱干玉戚八佾陳於庭而頌聲興夫帝王之道豈異指哉或曰良玉不琢又云非文亡以輔德二端異焉殷人執五刑以督姦傷肌膚以懲惡成康不式四十餘年天下不犯囹圄空虛秦國用之死者甚衆刑者相望耗矣哀哉烏虜朕夙寤晨興惟前帝王之憲永思所以奉至尊章洪業皆在方本任賢今朕親耕藉田以為衆先勸孝弟崇有德使者冠蓋相望問勤勞恤孤獨盡思竭神功烈休德未始云獲也今陰陽錯繆氛氣充塞群生寡遂黎民未濟庶恥貿亂賢不肖渾散未得其真故詳延特起之士庶幾乎今子大夫待詔百有餘人或道世務而未濟稽諸上古之不

同考之于今而難行毋廼牽於文繫而不得騁與各所繇異術所聞殊方與各悉對著于篇毋諱有司明其指畧切磋究之以稱朕意

又前同

蓋聞善言天者必有徵於人善言古者必有驗於今故朕垂問乎天人之應上嘉唐虞下悼桀紂寢微寢滅寢明寢昌之道虛心以改今子大夫明於陰陽所以造化習於先聖之道業然而文采未極豈惑乎當世之務哉條貫靡竟統紀未終意朕之不明與聽若眩與夫三王之教所祖不同而皆有失或謂久而不易者道也意豈異哉子大夫既已著大道之極陳治亂之端矣其悉之

究之熟之復之詩不云乎嗟尔君子毋常安息神之聽之介尔景福朕將親覽之子大夫其茂明之

又

蓋聞上古至治晝衣冠異章服而民不犯陰陽和五穀登六畜蕃甘露降風雨時嘉禾興朱中生山不童澤不涸麟鳳在郊菽龜龍游於沼河洛出圖書父不喪子兄不哭弟北發渠搜南撫交趾舟車所至人迹所及跂行喙息咸得其宜朕甚嘉之今何道而臻乎此子大夫修先聖之術明君臣之義講論洽聞有聲乎當世敢問子大夫夫人之道何所本始吉凶之效安所期焉禹湯水旱厥咎何由仁義禮知四者之宜當安設施屬統垂業

物鬼變化天命之符廢興何如天文地理人事之紀子大夫習焉其悉意正議詳具其對著之于篇朕將親覽焉靡有所隱

又冊公孫弘

問弘稱周公之治弘之材能自視孰與周公賢

賜嚴助書

當是元光初

制詔會稽太守君厭承明之廬勞侍從之事懷故土出為郡吏會稽東接於海南迎諸越北枕大江間者闊焉久不聞問具以春秋對毋以蘇秦從橫

詔問公卿

元光二年十月

朕飾子女呂配單于金幣文繡賂之甚厚單于待命加

嫚侵盜無已邊境被害朕甚閔之今欲舉兵攻之何如

賜陳后策元光五年

皇后失序惑於巫祝不可以承天命其上璽綬罷退居長門宮

赦鴈門代郡軍士詔六年春

夷狄無義所從來久間者匈奴數寇邊境故遣將撫師古者治兵振旅因遭虜之方八將吏新會上下未輯代郡將軍教鴈門將軍廣所任不肖校尉又背義妄行弃軍而北少吏犯禁用兵之法不動不教將率之過也教令宣明不得盡力士卒之罪也將軍已下廷尉使理正之而又加法於士卒二者並行非仁聖之心朕閔衆庶

陷害欲刷耻改行復奉正義厥路無繇其赦鴈門代郡軍士不循法者

詔議不舉孝廉者罪元朔元年十一月

公卿大夫所使總方畧一統類廣教化美風俗也夫本仁祖義衰德祿賢勸善刑暴五帝三王所繇昌也朕夙興夜寐嘉與宇內之士臻於斯路故旅耆老復孝敬選豪傑講文學稽叅政事祈進民心深詔執事興廉舉孝庶幾成風紹休聖緒夫千室之邑必有忠信三人並行厥有我師今或至闔郡而不薦一人是化不下究而積行之君子雍於上聞也二千石官長紀綱人倫將何以位朕燭幽隱勸元元厲蒸庶崇鄉黨之訓哉且進賢受

上賞蔽賢蒙顯戮古之道也其與中二千石禮官博士議不舉孝廉者罪

赦天下詔三月

朕聞天地不變不成施化陰陽不變物不暢茂易曰通其變使民不倦詩云九變復貫知言之選朕嘉唐虞而樂殷周據舊呂鑿新其赦天下與民更始諸逋貸及辭訟在後三年已前皆勿聽治

許諸侯王分子弟邑二年正月

梁王城陽王親慈同生願呂邑分弟其許之諸侯王請與子弟邑者朕將親覽使有列位焉

制詔御史諸侯王或欲推私恩分子弟邑者令各條上

朕且臨定其號名

益封衛青詔元朔二年

匈奴逆天理亂人倫暴長虐老以盜竊為稱行詐諸蠻夷造謀籍兵數為邊害故興師遣將以征厥罪詩不云乎薄伐獫狁至于太原出車彭彭城彼朔方今車騎將軍青度西河至高闕獲首三千三百級車輜畜產畢收為鹵已封為列侯遂西定河南地案榆谿舊塞絕梓領梁北河討蒲泥破符離斬輕銳之卒捕伏聽者三千一十七級執訊獲醜毆馬牛羊百有餘萬全甲兵而還益封青三千八百戶

封丞相弘詔元朔三年十一月

朕嘉先聖之道開廣門路宣招四方之士蓋古者任賢而序位量能以授官勞大者厥祿厚德盛者獲爵尊故武功以顯重而文德以行褒其以高城之平津鄉戶六百五十戶封丞相弘為平津侯

報公孫弘前同

古者賞有功褒有德守成上文遭遇右武未有易此者也朕夙夜庶幾獲承至尊懼不能寧惟所與共為治者君宜知之蓋君子善善及後世若茲行常在朕躬君不幸罹霜露之疾何恙不已乃上書歸侯乞骸骨是章朕之不德也今事少間君其存精神止念慮輔助醫藥以自持

赦天下詔三年三月

夫刑罰所以防姦也內長文所以見愛也以百姓之未治于教化朕嘉與士大夫日新厥業祗而不解其赦天

下張晏曰長文長文德也師古曰詔言有文德者即親內而崇長之所以見仁愛之道見謂顯示胡雷反

益封衛青五年

大將軍青躬率戎士師大捷獲匈奴王十有餘益封青八千七百戶而封青子伉為宜春侯子不疑為陰安侯子登為發干侯

封公孫敖等詔御史元朔五年

護軍都尉公孫敖三從大將軍擊匈奴常護軍傳校獲王封敖為合騎侯都尉韓說從大軍出冥渾至匈奴右

賢王屍為戲下搏戰獲王封說為龍維侯騎將軍賀從
大將軍獲王封賀為南廓侯輕車將軍李蔡垂從大將
軍獲王封蔡為樂安侯校尉李朔趙不虞公孫戎奴各
三從大將軍獲王封朔為陟軹侯不虞為隨成侯戎奴
為從平侯將軍李沮李息及校尉且如意中郎將綰皆
有功賜爵關內侯沮息如意食邑各三百戶

削梁王襄詔

元朔中

首惡失道任后也朕置相吏不逮無以輔王故陷不誼
不忍致法削梁王五縣奪王太后湯沐成陽邑臬任后
首于市

詔太常禮官

五年六月

蓋聞導民以禮風之以樂婚姻者居室之大倫也今禮
壞樂崩朕甚閔焉故詳延天下方聞之士咸薦諸朝其
令禮官勸學講議洽聞舉遺典禮以為天下先太常其
議予博士弟子宗鄉黨之化以厲賢材焉

賞霍去病等

元朔六年

票姚校尉去病斬首捕虜二千二十二級得相國當戶
斬單于大父行藉苦侯產捕季父罷姑比再冠軍以二
千五百戶封去病為冠軍侯上谷太守郝賢四從大將
軍捕首虜千三百級封賢為終利侯騎士孟已有功賜
爵關內侯邑二百戶校尉張騫從大將軍以嘗使大夏
留匈奴中久道軍知善水草處軍得以無飢渴因前使

絕國功封騫為博望侯

置武功賞官詔

六年六月

朕聞五帝不相復禮三代不同法所繇殊路而建德一也蓋孔子對定公以徠遠哀公以論臣非期不同所急異務也今中國一統而北邊未安朕甚悼之日者大將軍巡朔方征匈奴斬首虜萬八千級諸禁錮及有過者咸蒙厚賞得免減罪今大將軍仍復克獲斬首虜萬九千級受爵賞而欲移賣者無所流貶弋賜反九勸一為肥言欲

者無差次流行遣謁者巡行天下詔

元狩元年四月

朕聞咎繇對禹曰在知人知人則哲惟帝難之蓋君者

心也民猶支體支體傷則心憻但日者淮南衡山修文學流貨賂兩國接壤怵於邪說而造篡弑此朕之不德詩云憂心慘慘念國之為虐已赦天下滌除與之更始朕嘉孝弟力田哀夫老眊孤寡鰥獨或墮於衣食甚憐閔焉其遣謁者巡行天下存問致賜曰皇帝使謁者賜縣三老孝者帛人五匹鄉三老弟者力田帛人三匹年九十以上及鰥寡孤獨帛人二匹絮三斤八十以上米人三石有寃失職使者以聞縣鄉即賜無贅聚

議后土祀

元狩二年

今上帝朕親郊而后土無祀則禮不答也

益封霍去病

元狩二年春

票騎將軍率戎士踰烏盞討遼濮涉孤奴歷五王國輜
重人衆攝驚者弗取幾獲單于子轉戰六日過焉支山
千有餘里合短兵鏖擊蘭下殺折蘭王斬盧侯王銳悍
者誅全甲獲醜執渾邪王子及相國都尉捷首虜八千
九百六十級收休屠天祭金人師率滅什七益封去病
二千二百戶

又元狩二年夏

票騎將軍涉鈞者濟居延遂臻冰月氏攻祁連山揚武
乎鱧得得單于單相酋涂王及相國都尉以衆降下者
二千五百人可謂能舍服知成而止矣捷首虜三萬二
百獲五王王母單于閼氏王子五十九人相國將軍當

戶都尉六十三人師大率滅什三益封去病五千四百
戶賜校尉從至小月氏者爵左庶長鷹擊將軍破奴再
從票騎將軍斬遼濮王捕稽且王右千騎將王王母各
一人王子以下四十一人捕虜三千三百三十人前行
捕虜千四百人封破奴為從票侯校尉高不識從票騎
將軍捕呼于者王王子以下十一人捕虜千七百六十
八人封不識為宜冠侯校尉僕多有功封為煇渠侯合
騎侯敖坐行留不與票騎將軍會當斬為贖庶人

渾邪王降益封去病

元狩二年夏

票騎將軍去病率師征匈奴西域王渾邪王及厥衆萌
威犇於率以軍糧接食并將控弦萬有餘人誅撓悍捷

首虜八千餘級降異國之王三十二戰士不離傷十萬之衆畢懷集服仍興之勞爰及河塞庶幾無患以千七百戶益封票騎將軍減隴西北地上郡戍卒之半以寬天下繇役

封蕭何後

三年

詔御史以鄼戶二千四百封何曾孫慶為鄼侯布告天下令明知朕報相國德也

益封去病寺

四年

票騎將軍去病率師躬將所獲葷允之士約輕賈絕大漠涉獲單于章渠以誅北車者轉擊左大將雙獲旗鼓歷度難侯濟弓盧獲屯頭王韓王寺三人將軍相國當

戶都尉八十三人封狼居胥山禪於姑衍登臨翰海執訊獲醜七萬有四百四十三級師率減什二取食於敵卓行殊遠而糧不絕以五千八百戶益封票騎將軍右北平太守路博德屬票騎將軍會興城不失期從至搏余山斬首捕虜二千八百級封博德為邳離侯北地都尉衛山從票騎將軍獲王封山為義陽侯故歸義侯因淳王復陸支樓剌王伊即軒皆從票騎將軍有功封復陸支為杜侯伊即軒為衆利侯從票侯破奴昌武侯安稽從票騎有功益封各三百戶漁陽太守解校尉敢皆獲鼓旗賜爵關內侯解食邑三百戶敢二百戶校尉自為爵左庶長

齊王閔策

元狩六年

惟元狩六年四月乙巳皇帝使御史大夫湯廟立子閔為齊王嗚呼小子閔受茲青社朕承天序惟稽古建爾國家封于東土世為漢藩嗚呼念哉共朕之詔惟命不于常人之好德克明顯光義之不圖俾君子怠悉尔心允執其中天祿永終厥有愆不威廼凶于乃國害于尔躬嗚呼保國又民可不敬與王其戒之

封燕王策

嗚呼小子且受茲玄社建爾國家封于此土世為漢藩輔嗚呼薰鬻氏虐老獸心以姦巧邊眚朕命將率徂征厥罪萬夫長千夫長三十有二帥降旗奔師薰鬻徙域

北州以安悉尔心毋作怨毋作隳德毋廼廢備非教士不得從徵王其戒之

封廣陵王策

嗚呼小子胥受茲赤社建爾國家封于南土世世為漢藩輔古人有言曰大江之南五湖之間其人心輕揚州保疆三代要服不及以正嗚呼悉尔心祗祗兢兢廼惠廼順毋桐好逸毋邇宵人惟法惟則書云臣不作福不作威靡有後羞王其戒之

遣博士大寺循行天下詔

元狩六年六月

日者有司以幣輕多姦農傷而未衆又禁兼并之塗故改幣以約之稽諸往古制宜於今廢期有月

期音暮昏有餘月矣

而山澤之民未諭夫仁行而從義義立則俗易意奉憲者所以導之未明與將百姓所安殊路而禍度吏因乘執以侵蒸庶邪何紛然其擾也今遣博士大守六人分循行天下存問鰥寡廢疾無以自振業者貸與之諭三老孝弟以為民師舉獨行之君子徵詣行在所朕嘉賢者樂知其人廣宣厥道士有特招使者之任也詳問隱處亡位及寃失職姦猾為害野荒治苛者舉奏郡國有所以為便者上丞相御史以聞

得寶鼎

元符末年

間者河溢歲數不登故廵祭后土祈為百姓育穀今年豐稔未報鼎昌為出哉

遣博士中守循行詔

元鼎元年九月

仁不異遠義不辭難今京師雖未為豐年山林池澤之饒與民共之今水潦移於江南迫隆冬至朕懼其飢寒不治江南之地水耕水耨燒草下水種稻草與稻並生高七八寸因悉芟去復下水方下巴蜀之粟致之江陵遣博士中守分循行諭告所抵無令重困吏令有振救飢民免其危者具舉以聞

封禪大詔

元鼎四年夏

制詔御史昔禹疏九河決四瀆間者河溢率陸隄繇不息朕臨天下二十有八年矣天若遺朕士而大通焉乾稱飛龍鴻漸于般朕意庶幾與焉其以二千戶封地士

將軍大為樂通侯賜列侯甲第重千人乘輿斥車馬帷帳器物以充其家

封周子南君詔四年十一月

祭地冀州瞻望河洛巡省豫州觀于周室邈而無祀詢問耆老廼得孽子嘉紹其封嘉為周子南君以奉周祀

封石慶詔元鼎五年九月

制詔御史萬石君先帝尊之子孫至孝其以御史大夫慶為丞相封牧上侯

封真定泗水王詔元鼎五年六月

常山憲王早夭后妾不和造孽誣爭陷于不誼以滅國朕甚閔焉其封憲王子平三萬戶為真定王子商三萬

戶為泗水王

卜式賜爵詔元鼎五年

朕聞報德以德報怨以直今天下不幸有事郡縣諸侯未有奮繇直道者也齊相雅行躬耕隨牧畜番輒分昆弟更造不為利惑日者北邊有興上書助官往年西河歲惡率齊人入粟今又首奮雖未戰可謂義刑於內矣其賜爵關內侯黃金四十斤田十頃布天下使明知之

討呂嘉等詔元鼎五年秋

天子微弱諸侯力政譏臣不討賊呂嘉建德等反自立晏如令粵人及江淮以南樓船十萬師往討之

封韓千秋等元鼎五年三月

韓千秋雖亡成功亦軍鋒之冠封其子延年為成安侯
摎樂其姊為王太后首願屬漢封其子廣德為襲侯襲
龍字

詔丁酉拜況于郊五年十月

朕以眇身託于王侯之上德未能綏民民或飢寒故巡
祭后土以祈豐年冀州睢壤廼顯文昂獲薦於廟渥注
水出焉朕其御焉戰戰兢兢懼不克任思昭天地內惟
自新詩云四牡翼翼以征不服親省邊垂用事極望見
泰一修天文檀文類曰檀祭也辛卯夜若景光十有二
明易曰先甲三日後甲三日朕甚念年歲未成登飭躬
齊戒丁酉拜況于郊

敕責楊僕書元鼎六年

將軍之功獨有先破石門尋隄非有斬將竊旗之實也
烏足以驕人哉前破番禺捕降者以為虜掘死人為獲
是一過也建德呂嘉逆罪不容於天下將軍擁精兵不
窮追超然以東越為接不念其勤勞而造佞巧請乘傳
行塞因用歸家懷銀黃垂三組夸鄉里是三過也失期
內顧以道惡為解失尊尊之序是四過也欲請蜀問
君賈幾何對曰率數百武庫日出兵而陽不知挾偽子
君是五過也受詔不至蘭池官明日又不對假令將軍
之吏問之不對令之不從其罪何如推此心以在外江
海之間可得信乎今東越深入將軍能率眾以掩過不

減內史地租詔

元鼎六年見溝洫志

農天下之本也泉流灌浸所以育五穀也左右內史地名山川原甚衆細民未知其利欲為通溝瀆畜陂澤所以備旱也今內史稻田租挈重不與郡同其議減令吏民勉農盡地利平繇行水勿使失時

改元元封詔

朕以眇身承至尊兢兢焉惟德菲薄不明于禮樂故用事八神遭天地况施著見景象昏然如有聞震于怪物欲止不敢遂登封泰山至于梁父然後升壇肅然自新嘉與士大夫更始其以十月為元封元年行所巡至博奉高地立歷城梁父民曰祖逋

除加年七十以

上孤寡帛人二匹

無出今年筭賜天下民爵一級

女子百戶牛酒

封泰山

元封元年

古者天子五載一巡狩用事泰山諸侯有朝宿地其令諸侯各治邸泰山下

巡邊詔

元封元年十月

南越東甌咸伏其辜西蠻北夷頗未輯睦朕將巡邊垂擇兵振旅躬秉武節置十二部將軍親帥師焉

遣使告單于

前同

南越王頭已懸於漢北闕矣單于能戰天子自將待邊不能亟來臣服何但亡匿幕北寒苦之地為

遷東越民詔元年封

東越險阻反覆為後世患遷其民於江淮間

增太室祠詔元年封元年正月

朕用事華山至于中嶽獲駮庶見夏后啓母石翌日親登嵩高御史乘屬在廟旁吏卒咸聞呼萬歲者三登禮罔不答其令祠官加增太室祠禁無伐其草木以山下戶三百為之奉邑名曰崇高獨給祠復亡所與

天旱元年封

天旱意乾封乎其令天下尊祠靈星焉

甘泉產芝詔二年六月

甘泉宮內中產芝九莖連葉上帝博臨不異下房賜朕

弘休其赦天下賜雲陽都百戶牛酒一云甘泉房中生芝九莖天下毋

作令復

使公孫遂往朝鮮元年封二年

將率不能前乃使衛山諭降右渠不能顯決與左將軍相誤卒沮約今兩將圍城又乖異以故久不決使故濟南太守公孫遂往正之有便宜得以從事

赦所幸縣詔三年四月

朕巡荆揚輯江淮物會大海氣以合秦山上天見象增修封禪其赦天下所幸縣毋出今年租賦賜鰥寡孤獨帛貧窮者粟

赦汾陰寺詔四年十月

朕躬祭后土地祇見光集于靈壇一夜三燭幸中都宮殿上見光其赦汾陰夏陽中都罪死以下賜三縣及楊氏皆無出今年租賦

察茂才異等詔

盖有非常之功必待非常之人故馬或奔蹏而致千里士或有負俗之累而立功名夫泛駕之馬跣弛之士亦在御之而已其令州郡察吏民有茂材異等可為將相及使絕國者

赦汾陰詔

六年三月

朕禮首山昆田出珍物化為黃金祭后土 光三燭其赦汾陰殊死以下賜天下貧民布帛人一匹

報石慶

當是元封五年間

間者河水滔陸泛濫十餘郡隄防勤勞弗能墮塞朕甚憂之是故巡方州禮嵩嶽通八神以合宣房濟淮江歷山濱海問百年民所疾苦惟吏多私徵求無已云者便居者擾故為流民法以禁重賦乃者封泰山皇天嘉况神物並見朕方答氣應未能承意是以切比閭里知吏姦邪委任有司然則官曠民愁盜賊公行往年觀明堂赦殊死無禁錮咸自新與更始今流民愈多計文不改君不繩責長吏而請以興徙四十萬口搖蕩百姓孤兒幼年未滿十歲無罪而坐率朕失望焉今君上書言倉庫城郭不充實民多貧盜賊衆請入粟為庶人夫懷知

民貧而請益賦動危之而辭位欲安歸難乎君其反室

詔兒寬元封七年

與博士共議今宜何以為正朔服色何上

改元詔

廼者有司言歷未定廣延宣問以考星度未能讎也蓋聞古者黃帝合而不死名察發斂定清濁起五部建氣物分數然則上矣書闕樂弛朕甚難之依違以惟未能修明其以七年為元年

赦汾陰安邑詔太初二年四月

朕用事介山祭后土皆有光應其赦汾陰安邑殊死以下

封李廣利詔太初四年

匈奴為害久矣今雖徙幕北與旁國謀共惡絕大月氏使遮殺中郎將江故鴈門守攘危須以西及大宛皆合約殺期門車令郎中將朝及身毒國使隔東西道貳師將軍廣利征討厥罪伐勝大宛賴天之靈從汧河出涉流沙通西海山雪不積士大夫徑度獲王首虜珍怪之物畢陳於闕其封廣利為海西侯食邑八千戶

欲遂困胡詔太初四年

高皇帝遺朕平城之憂高后時單于書絕悖通昔齊襄公復九世之讎春秋大之

詔路博德天漢二年

吾欲子李陵騎云欲以少擊衆今虜入西河其引兵走西河遮鈞營之道

詔李陵前同

以九月發出遮虜鄣至東浚稽山南龍勒水徘徊觀虜即無所見從浞野侯趙破奴故道抵受降城休士因騎置以聞所與博德言者云何具以書對

報胡建制天漢中

司馬法曰國容不入軍軍容不入國何文吏也三王或誓於軍中欲民先成其虜也或誓於軍門之外欲民先意以待事也或將交及而誓致民志也建又何疑焉

賜吾丘壽玉璽書

傳言東郡盜起當是天漢二年

子在朕前之時知畧輻湊以為天下少雙海內寡二及至連十餘城之守任四千石之重職事並廢盜賊從橫甚不稱在前時何也

黃金改名

太始二年三月

有司議曰往者朕郊見上帝西登龍首獲白麟以饋宗廟渥洼水出天馬泰山見黃金宜改故名今更黃金為麟趾裏蹠以協瑞焉

報齊人延年

太始初

延年計議甚深然河廼大禹之所道也聖人作事為萬世功通於神明恐難改更

封李壽等

征和二年

盖行疑賞所以申信也其封李壽為邗侯張富昌為題昌為題侯

封劉屈氂

征和二年

制詔御史故丞相賀倚舊故乘高執而為邪興美田以利子弟賓客不顧元元無益邊穀貨賂上流朕忍之久矣終不自草廼以邊為援使內郡自省作車又令耕者自轉以困農煩擾畜者重馬傷耗武備衰減下吏妄賦百姓流亡又詐為詔書以姦傳朱安世獄已正於理其以涿郡太守屈氂為左丞相長史為兩府以待天下遠方之選夫親親任賢周唐之道也以澎戶二千二百封左丞相為澎侯

賜丞相璽書前

捕斬及者自有賞罰以牛車為櫓毋接短兵多殺傷士眾堅閉城門毋令及者得出

貴問御史大夫前

司直縱及者丞相斬之法也大夫何以擅止之

詔畜馬補邊征和四年

前有司奏欲益民賦三十助邊用是重困老弱孤獨也而今又請遣卒田輪臺輪臺西於車師千餘里前開陵侯擊車師時危須尉犁樓間六國子弟在京師者皆先歸發畜食迎漢軍又自發兵凡數萬人王各自將共圍車師降其王諸國兵便罷力不能復至道上食漢軍漢

軍破城食至多然士自載不足以竟師强者盡食畜產
羸者道死數千人朕發酒泉驢橐駝負食出玉門迎軍
吏卒起張掖不甚遠然尚廝留甚衆曩者朕之不明以
軍侯弘上書言匈奴縛馬前後足置城下馳秦人我匈
若馬又漢使者久留不還故興遣貳師將軍欲以言使
者威重也古者卿大夫與謀參以著龜不吉不行廼者
以縛馬書徧視丞相御史二千石諸大夫郎為文學者
廼至郡屬國都尉成忠趙破奴等皆以虜自縛其馬不
祥甚哉為欲以見強夫不足者視人有餘易之卦得大
過爻在九五匈奴困敗公車方士大史治星望氣及大
卜龜著皆以為吉匈奴必破時不可再得也又曰北伐

行將於駙山必克卦諸將貳師最吉故朕親發貳師下
駙山詔之必毋深入今計謀卦兆皆反繆重合侯得虜
候者言聞漢軍當來匈奴使巫理羊牛所出諸道及水
土以詛軍單于遺天子馬裘常使巫祝之縛馬者詛軍
事也又卜漢軍一將不告匈奴常言漢極大然不能飢
渴失一狼走千羊廼者貳師敗漢軍士死畧離散悲痛
常在腹心今請遠田輪臺欲起亭隧是擾勞天下非所
以優民也今朕不忍聞大鴻臚等又議欲募囚徒送匈
奴使者明封侯之賞以報忿五百所弗能為也且匈奴
得漢降者常捉掖搜索問以所聞今邊塞永正闌出不
禁障候長吏使卒獵獸以皮肉為利卒苦而逢火乏失

亦上集不得後降者來若補生口虜廼知之當今務在
禁苛暴止擅賦力本農修馬復令以補闕母乏武備而
已郡國二千石各上進畜馬方畧補邊狀與計對

搜粟詔

方今之務在於力農以趙過為搜粟都尉

報車千秋

征和四年

朕之不德自左丞相與貳師陰謀逆亂巫蠱之禍流及
士大夫朕日一食者累月廼何樂之聽痛士大夫常在
心既重不咎雖然巫蠱始發詔丞相御史督二千石求
捕廷尉治未聞九卿廷尉有所鞠也曩者江充先治甘
泉宮人轉至未央椒房以及敬聲之疇李禹之屬謀入

匈奴有司無所發今丞相親掘蘭臺蠱驗所明知也至
今餘巫頗脫不止陰賊侵身遠近為蠱朕媿之甚何壽
之有敬不舉君之觴謹謝丞相二千石各就館書曰無
偏無黨王道蕩蕩毋有復言

赦天下詔

後元元年二月

朕郊見上帝巡于北邊見群鶴留止以不羅罔靡所獲
獻薦于秦時光景並見其赦天下

封莽通等

後元元年六月

侍郎莽通獲及將如侯長安男子景建從通獲少傅石
德可謂元功矣大鴻臚商立成力戰獲反將能張光其
封通為重合侯建為德侯成為純侯

西漢詔令卷第六

西漢詔令卷第七

昭帝五

勿收振貸詔始元二年八月

往年灾害多今年蠶麥傷所振貸種食勿收責毋令民出今年田租

詔民勿出馬四年七月

比歲不登民匱於食流庸未盡還往特令民共出馬其止勿出諸給中都官者且減之

舉賢良文學詔五年六月

朕以眇身獲保宗廟戰戰栗栗夙興夜寐修古帝王之事通保傳傳孝經論語尚書未云有明具令三輔太常

舉賢良各二人郡國文學高第各一人賜中二千石以下至吏民爵各有差

立鈞町王詔六年七月

鈞町使毋波率其邑君長人民擊反者斬首捕虜有功其立毋波為鈞町王母一作亡大鴻臚廣明將率有功賜爵關內侯食邑

賜遺韓福等詔元鳳元年三月

朕聞勞以官職之事其務修孝弟以教鄉里行道舍傳舍縣次具酒肉食從者及馬長吏以時存問常以歲八月賜羊一頭酒二斛不幸死者賜複衾一祠以中牢常以正月賜羊酒有不幸者賜衣被一襲

封杜延年等詔十月

左將軍安陽侯祭票騎將軍桑樂侯安御史大夫弘羊比數以邪枉于輔政大將軍不聽而懷怨望與燕王通謀置驛往來相約結燕王遣壽西長孫縱之守賂遺長公主丁外人謁者杜延年大將軍長史公孫遺等交通私書共謀令長公主置酒伏兵殺大將軍徵立燕王為天子大逆無道故稻田使者燕倉先發覺以告夫司農敞敞告諫大夫延年延年以聞丞相徵事任官手捕斬祭丞相少史王壽將安入府門皆已伏誅吏民得以安封延年倉官壽皆為列侯

賜燕王璽書

昔高皇帝王天下建立子弟以藩屏社稷先日諸呂陰謀大逆劉氏不絕若髮賴絳侯誅討賊亂尊立孝文以安宗廟非以中外有人表裏相應故邪樊鄴曹灌攜劔推鋒從高皇帝懇蓄除害耘鉏海內當此之時頭如蓬葆勤苦至矣然其賞不過封侯今宗室子孫曾無暴衣露冠之勞裂地而王之分財而賜之父死子繼兄終弟及今王骨肉至親敵吾一體廼與佗姓異族謀害社稷親其所疏疏其所親有逆悖之心無忠愛之義如使古人有知當何面目復奉齊耐見高祖之廟乎

赦燕太子等詔

十月

燕王迷惑失道前與齊王子劉澤等為逆抑而不揚望

王反道自新今廼與長公主及左將軍桀等謀危宗廟王及公主皆自伏辜其赦王太子建公主子文信及宗室子與燕王上官桀等謀父母同產當坐者皆免為庶人其吏為桀等所誣誤未發覺在吏者除其罪

母歛馬口錢詔

二年六月

朕聞百姓未贍前年減漕三百萬石頗省乘輿馬及苑馬以補邊郡三輔傳馬其令郡國母歛今年馬口錢三輔太常得以叔粟當賦

詔母漕

三年正月

廼者民被水灾頗匱於食朕虛倉廩使使者振困乏具止四年母漕三年以前所振貸非丞相御史所請邊郡

受生者勿收責

封范明友守詔四年四月

度遼將軍明友前以羗騎校尉將羗王侯君長以下擊益州反虜後復率擊武都反氏今破烏柘斬虜獲生有功其封明友為平陵侯

封傅介子詔元鳳四年五月

樓蘭王安歸常為匈奴間候遮漢使者發兵殺略衛司馬安樂光祿大夫忠期門郎遂成守三軍及安息大宛使盜取節即獻物甚逆天理平樂監傅介子持節使誅斬樓蘭王安歸首縣之北關以直報怨不煩師衆其封介子為義陽侯食邑七百戶士刺王者皆補侍郎

封張安世詔六年十一月

右將軍光祿勳安世輔政宿衛肅敬不怠十有三年咸以康寧夫親親任賢唐虞之道也其封安世為富平侯叔粟當賦詔

夫穀賤傷農今三輔太常穀減賤其令叔粟當今年賦減口賦詔元平元年二月

天下以農桑為本日者省用罷不急官減外繇耕桑者益衆而百姓未能家給朕甚愍焉其減口賦錢

西漢詔令卷第七

Blank columns for text within the main frame.



